



ქალაქ ფოთის მუნიციპალიტეტის საკრებულო განკარგულება №18/58



2017 წლის 2 აგვისტო

„მერები ეკონომიკური ზრდისთვის“ პროექტის (ინიციატივის) განხორციელებასთან დაკავშირებით, გასატარებელი ღონისძიებების შესახებ

პროექტი „მერები ეკონომიკური ზრდისთვის“ წარმოადგენს ევროკავშირის ინიციატივას, რომელიც დაიწყო 2016 წლის 26 ოქტომბერს, ქალაქ ერევანში და მიმართულია აღმოსავლეთ ქვეყნებში მოქმედ ადგილობრივ ხელისუფლებებზე: სომხეთი, აზერბაიჯანი, ბელარუსი, საქართველო, მოლდოვა, უკრაინა.

პროექტი „მერები ეკონომიკური ზრდისთვის“ გულისხმობს ადგილობრივი ეკონომიკური განვითარებისადმი იმგვარ მიდგომას, რომელმაც ბოლო სამი ათეული წლის განმავლობაში მნიშვნელოვანი სარგებელი მოიტანა მსოფლიოში და განსაკუთრებით ევროკავშირის მასშტაბით. ეს მიდგომა ეფუძნება შემდეგ მოსაზრებებს:

მსოფლიოში არსებული სამუშაო ადგილების სამი მეოთხედი შექმნილია კერძო სექტორში. შესაბამისად, კერძო სექტორის გაზრდა წარმოადგენს ეკონომიკური, სოციალური და დასაქმების სექტორის ფართო მასშტაბის განვითარების უმთავრეს პირობას. თითოეულ რეგიონს, ქალაქსა და რაიონს აქვს განსაკუთრებული სიძლიერე, რაც შესაძლებელია გამოყენებულ და მიმართულ იქნას ზრდის, განვითარებისა და დასაქმების უზრუნველსაყოფად. ზრდა და განვითარება დამოკიდებულია მრავალ გლობალურ ფაქტორზე, თუმცა მათზე ასევე უდიდეს გავლენას ახდენს ადგილობრივად გამოვლენილი ძალისხმევა. გლობალური მოთამაშენი მხოლოდ ისეთ ადგილებს არჩევენ ინვესტიციის ჩასადებად, სადაც მიმზიდველი და ხელსაყრელი ადგილობრივი პირობებია. არსებობს უამრავი მაგალითი იმისა, რომ ინვესტორები ეძებენ ადგილობრივი ფაქტორების ერთობლიობას, როდესაც განიხილავენ ინვესტირების შესაძლებლობებს ქვეყნის ერთ ნაწილში და არა მეორეში: ბაზრებთან კავშირი; ადამიანური რესურსების შესაძლებლობა, მიწა და შესაბამისი ინფრასტრუქტურა, თანამშრომლობისათვის გახსნილი ადგილობრივი ხელისუფლება, კარგი ადგილობრივი სერვისები, ცხოვრების ისეთი დონე და ხარისხი, რომელიც მოტივაციას უჩენს მენეჯმენტსა და თანამშრომლებს დასაქმდნენ და იცხოვრონ იქ, სადაც კომპანია ინვესტიციის ჩადებას გადაწყვეტს და სხვა.

პროექტი „მერები ეკონომიკური ზრდისთვის“ ინიციატივაში ჩართვით ქალაქებს ექნებათ წვდომა მრავალფეროვან ექსკლუზიურ და დამხმარე სახის სერვისებზე, მაღალი დონის ექსპერტულ ცოდნაზე და ასევე, დამატებით ქვევით ჩამოთვლილ სხვადასხვა შესაძლებლობებზე. კონკრეტულად:

- ექსპერტების მხარდაჭერა ადგილობრივი ეკონომიკური განვითარების გეგმის დასახვისა და განხორციელების პერიოდში;

- უფასო წვდომა ადგილობრივი ეკონომიკური განვითარების შესახებ რჩევებსა და საერთაშორისო საექსპერტო ცოდნაზე;
- დახმარება კონკრეტული პროექტების გამოვლენასა და განვითარებაში და მხარდაჭერა მათი განხორციელების პროცესში;
- მიღწევების შესახებ ინფორმაციის გავრცელების მხარდაჭერა, რაც დამატებითი ინვესტიციების მოზიდვას ისახავს მიზნად;
- დახმარების გაწევა გრანტების მოძიებისა და პროექტის შეთავაზების მომზადების პროცესში;
- ისეთი ადგილობრივი პარტნიორების მოძიება და ჩართვა პროცესში, როგორებიცაა ბიზნესის, საგანმანათლებლო და სამეცნიერო ინსტიტუტები და არასამთავრობო ორგანიზაციები;
- წვდომა საერთაშორისო პარტნიორებსა და მსგავს მმართველ ორგანოებთან;
- ადგილობრივ ხელისუფლებებს შორის ქვეყანათაშორისი თანამშრომლობის მხარდაჭერა EaP-ის მთელ რეგიონში;
- ტრენინგები, სასწავლო ტურები და თემატური სემინარები მუნიციპალური ორგანოს თანამშრომლებისა და ადგილობრივი პარტნიორებისათვის;
- წვდომა სასარგებლო ინფორმაციაზე და მისი გავრცელება;
- საკონტაქტო ფორუმისა და კლუბის „M4EG Club“ წევრობა;
- პროექტი „მერები ეკონომიკური ზრდისთვის“ ინიციატივის სპეციალური ლოგოს გამოყენების უფლება ხელმომწერი მუნიციპალიტეტებისათვის შიდა და თუ გარე პოზიციონირების დროს.

ევროკავშირი, M4EG-ის სამდივნოსა და სხვა პარტნიორების (როგორცაა მსოფლიო ბანკი) ხელშეწყობით, იღებს პასუხისმგებლობას და შესწევს უნარი გააფართოვოს და განავითაროს ადგილობრივი პარტნიორების შესაძლებლობები, რათა ხელი შეეწყოს ადგილობრივ ეკონომიკურ განვითარებას.

M4EG ინიციატივის ფარგლებში ეკონომიკურ განვითარებას ლოკალურად შეეწყობა ხელი მუნიციპალური ორგანოების მიერ და მთავარი აქცენტი გადატანილი იქნება ზრდაზე, დასაქმებასა და სამუშაო ადგილების შექმნაზე. ეს მიდგომა გულისხმობს შემდეგს:

- პარტნიორობა (LED პარტნიორობა) ადგილობრივ ხელისუფლებას, კერძო სექტორსა და სამოქალაქო საზოგადოებას შორის;
- მოთხოვნაზე ორიენტირებული დახმარება პატარა კომპანიებს და უკვე მოქმედ ან პოტენციურ ინდივიდუალურ მეწარმეებს;
- გარე ფაქტორებზე დაყრდნობისა და მთავრობის მაღალი ეშელონებისაგან ინიციატივის ლოდინის ნაცვლად, ისეთ ქმედებებზე ფოკუსირება, რომელიც წახალისებს განვითარებას;
- პრაქტიკული და ფოკუსირებული მიდგომა, რომელიც ხასიათდება კონკრეტული ქმედებებით - ბევრი მათგანი შესაძლებელია იყოს მცირე, მაგრამ ყველა ერთად შეთანხმებული გეგმის განუყოფელ ნაწილს წარმოადგენს;
- სპეციალური სისტემა დიალოგისა და მონიტორინგისათვის და ასევე, გეგმების უწყვეტი ცვლილებებისა და ადაპტაციისათვის, რომელიც მიზნად ისახავს უპასუხოს ადგილობრივ საჭიროებებს;
- ურთიერთთანამშრომლობა სხვადასხვა მუნიციპალიტეტებსა და თავად მუნიციპალიტეტების სტრუქტურებს შორის, ასევე სხვა საზოგადოებრივ ორგანოებსა და მთავრობის მაღალ ეშელონებს შორის;
- ორიენტირება შედეგებზე და იმ სარგებელის დანახვა, რომელიც დროთა განმავლობაში გროვდება ადგილობრივად ზრდის, განვითარებისა და დასაქმების კუთხით.

არსებობს გარკვეული განსხვავებები მუნიციპალური მართვის კუთხით აღმოსავლეთის პარტნიორობის (EaP) ექვსივე ქვეყანაში, თუმცა ყოველი მოდელი გულისხმობს სახელმწიფოს, სამინისტროების, სააგენტოებისა და ზოგიერთი რეგიონული მმართველობითი ორგანოს აქტიურ ჩართვას ეკონომიკური განვითარების სტიმულირებისა და მხარდაჭერის პროცესში. ადგილობრივი ეკონომიკური განვითარების მიზნით M4EG-ის ფარგლებში განხორციელებული ქმედებები მიზნად ისახავს რაც შეიძლება მეტი რეგიონული თუ ეროვნული დონის აქტორების ჩართვას განვითარების პროცესში, რათა ადგილობრივმა მოწინააღმდეგეებმა უფრო მეტად ისარგებლონ ამ პროცესით; თუმცა,

ადგილობრივი ეკონომიკური განვითარების ქმედებების უმთავრეს ფოკუსსა და მიზანს წარმოადგენენ ის ფაქტორები, რომლებიც პირდაპირ უწყობენ ხელს ზრდას, განვითარებასა და დასაქმებას და ამავე დროს მათი მართვა შესაძლებელია ადგილობრივად განხორციელებული ქმედებებისა და ძალისხმევების მეშვეობით.

EaP-ის მრავალ ქვეყანას უკვე საკმაო გამოცდილება აქვს ეროვნული თუ რეგიონული განვითარების დაგეგმვის კუთხით - ზოგიერთმა მათგანმა ეს გამოცდილება მემკვიდრეობად მიიღო ადრინდელი ცენტრალიზებული დაგეგმვის პრაქტიკიდან, ხოლო ზოგმა თავად შეიმუშავა ეს მიდგომა ბოლო 10-15 წლის განმავლობაში, დონორების აქტიური დახმარების მეშვეობით და ეს განსაკუთრებით ეხება რეგიონული განვითარების საკითხს. იქ, სადაც ეს გეგმა არსებობს და მუშაობს, M4EG ინიციატივა გააგრძელებს შენებას უკვე აგებულ ბაზისზე და კიდევ უფრო განავითარებს და წახალისებს მშენებლობის პროცესს.

საქართველოს ორგანული კანონის „ადგილობრივი თვითმმართველობის კოდექსის“ მე-16 მუხლის მე-3 პუნქტის შესაბამისად, მუნიციპალიტეტი უფლებამოსილია საკუთარი ინიციატივით გადაწყვიტოს ნებისმიერი საკითხი, რომლის გადაწყვეტაც საქართველოს კანონმდებლობით არ არის ხელისუფლების სხვა ორგანოს უფლებამოსილება და აკრძალული არ არის კანონით.

აღნიშნულიდან გამომდინარე:

მუხლი 1.

ქალაქ ფოთის მუნიციპალიტეტის მერმა (ირაკლი კაკულია) „მერები ეკონომიკური ზრდისთვის“ პროექტის (ინიციატივის) განხორციელებასთან დაკავშირებით გაატაროს სათანადო ღონისძიებები (ხელი მოაწეროს შესაბამის დოკუმენტაციას და სხვა).

მუხლი 2.

საქართველოს ზოგადი ადმინისტრაციული კოდექსის 52-ე მუხლის მე-2 ნაწილის, საქართველოს ადმინისტრაციული საპროცესო კოდექსის 22-ე მუხლის მე-3 ნაწილის, საქართველოს ზოგადი ადმინისტრაციული კოდექსის 178-ე მუხლის შესაბამისად, განკარგულება შეიძლება გასაჩივრდეს დაინტერესებული მხარის მიერ გაცნობიდან ერთი თვის ვადაში, ფოთის საქალაქო სასამართლოში (მისამართი: ქალაქი ფოთი, დავით აღმაშენებლის ქუჩა №3).

მუხლი 3.

განკარგულება ძალაშია 2017 წლის 2 აგვისტოდან.

საკრებულოს თავმჯდომარის
მოვალეობის შემსრულებელი,
თავმჯდომარის მოადგილე

აკაკი დარჯანია